



UMP laksana ibadah korban

KUANTAN 11 Dis. – Ibadah korban sempena Hari Raya Aidil Adha kali ini turut diraikan oleh Universiti Malaysia Pahang (UMP) yang mengorbankan empat ekor lembu dan tiga ekor kambing.

Pengawai Perhubungan Awam UMP, Nadzariah Mohamed berkata, seramai 80 kakitangan institusi pengajian tinggi (IPT) itu termasuk mahasiswa menyertai ibadah tersebut yang dilaksanakan di pekarangan Masjid UMP, di sini pagi semalam.

“Majlis Korban Perdana ini dimulakan pada pukul 9 pagi, ia turut melibatkan kerja-kerja menyembelih, memotong, melapah dan mengagih daging,” katanya menerusi satu kenyataan akhbar di sini hari ini.

Program

Hadir sama pada program itu Pengarah Pusat Teknologi Maklumat dan Komunikasi UMP, Profesor Dr. Abdullah Embong, dekan-dekan dan ketua-ketua jabatan.

Program tahunan UMP itu dianjurkan Pusat Islam dan Pembangunan Insan (PIPI). Daging korban diagihkan kepada fakir miskin, warga UMP dan penduduk sekitar Gambang termasuk Seri Fajar dan Mahkota Aman.

Menurut Pengarah PIPI, Zuridan Mohd. Daud, program tersebut mampu mendidik warga UMP agar terus melaksanakan ibadah korban sebagai pemangkin untuk memperjuangkan Islam di negara ini.

“Ibadah korban juga mampu menghindarkan manusia daripada sifat-sifat negatif seperti kedekut, bakhil, tamak, takbur dengan kekayaan yang dikurnia Allah,” katanya.

Selain itu beliau berkata, korban juga dapat memupuk budaya bergotong royong dan bekerjasama di kalangan warga UMP di samping mengeratkan ukh-
wah.